



Uunga siunnersuut Nioqqutissanik eqqussuineq annissuinerlu pillugit Inatsisartut Inatsisaata allannngortinneqarneranik Inatsisartut inatsisaat (Nunatsinnut angalasunik nakkutilliineq kiisalu aningaasanut atoriaannarnut il.il. killiliussamik appaaneq)
(Aningaasaqarnermut Akileraartarnermullu Naalakkersuisoq)
(Siullermeerneqarnera)

Demokraatinut pingaartuuvoq, inatsisit inuiaqatigiinni ineriartorneq aammalu unammilligassat nutaat pinngortut malinnaaffigjuarnissaat. Siunnersuut maanna suliarisarput, tassungarluinnaq assersuutissaqqippoq.

Nuummi nutaamik mittarfeqalerneratigut malittarisassanik sukaterinissamik pisariaqartitsineq pilerpoq, nioqqutissat akitsuutitaqanngitsut malittarisassanik unioqqutitsiviusinnaajunnaarlugit nunanut allanut angalasuniit nunatta iluani angalasunut tunniuteqqinnissaat pinngitsoorniarlugu.

Taamaattumik Demokraatit tamakkiisumik taperserpaat, Akileraartarnermut Aqutsisoqarfik nakkutilliinissamut annertunerusumik pisinnaatitaaffeqalernissaa, nunanut allanut angalasuinnaat, akitsuuteqanngitsunik nassarsinnaalersillugit.

Pissusissamisoortumik kingunerisassaattut soorunami isumaqatigaarput, nunatta iluani angalasunut akitsuutitaqanngitsumik nioqqutissanik tunniussineq inerteqqutaatinneqassasoq. Suliniut pisariaqartoq pitsaasumik sunniuteqarluartumillu nakkutilliineq ingerlanneqassappat.

Tassungalu ilutigalugu aningaasanik tigoriaannarnik eqqussinerup qummut killinga 50.000-iniit 15.000 koruuninut apparneqartussatut siunnersuut isumaqatigaarput.

Qummut killigitinneqartup apparneratigut, aningaasarpassuarnik toqqorterinnissinnaaneq ajornakusoornulissaaq, inatsisinik unioqqutitsilluni sulialinninngaaneersunit. Taamaaliorneq sakkussaavoq pingaarutilik pinerlunnikkut aningaasarsianik malunnarunnaarsaanerup suliniutigineqarneranut. Minnerunngitsumik aanngajaarniutinik tuniniaanermit aammalu pinerlunnernit allanit, aningaasat tigoriaannaat atorineqakkajummata aningaasat suminngaanneereri isertuunniarsinnaanerannut.

Aningaasanik eqqussinerup qummut killigitinneqartut apparneratigut ersarissuliorneq annertusarneqassaaq, oqartussaasut nakkutiginnissinnaanerat annertusarneqarluni ersarissumillu oqariartuutaalluni, nunarput aningaasatigut pinerlunniarnermut atorineqanngilluinnassasoq.

Taamatut oqaaseqarlunga nalunaarutigissavara, Demokraatit siunnersuut una akuereqqullugu innersuummassuk aammalu Aningaasaqarnermut- aamma Akileraartarnermut ataatsimiititaliami



aappassaaniinginnerani suliareqqinneqarnissaa innersuussutigalugu.